

Hfz. Nedžad Vehabović
Behram-begova medresa u Tuzli

HAFIZI BEHRAM-BEGOVE MEDRESE U TUZLI

UVOD

Behram-begova medresa u Tuzli, kao najstarija odgojno-obrazovna institucija u sjeveroistočnoj Bosni, i njeni muderrisi, inspirisani kur'anskim ajetima i hadisima Muhammeda a.s. koji govore o vrijednosti učenja Kur'ana napamet, aktivno promoviraju i motiviraju svoje učenike da krenu putem hifza Časnog Kur'ana. U periodu obnovljenog rada Behram-begove medrese, od 1993. godine do danas, ova odgojno-obrazovna ustanova je promovisala stotinu sedam hafiza.

U prošlim brojevima Kapije, godišnjaka Behram-begove medrese u Tuzli, predstavili smo hafize Medrese u periodu od 1993. do 2023. godine. U tom periodu hifz je završilo devedeset devet hafiza. U ovom radu predstavljamo hafize Behram-begove medrese koji su najčasniju titulu stekli u 2024. godini.

HAFIZI

100. Hfz. Samir Mehić – sin rahmetli Šeće i rahmetli Hanife, rođen je 12.6.1981. godine u Gradačcu. Odrastao je u Donjoj Zelinji (Gradačac) gdje je završio osnovnu školu i pohađao mekteb pred muallimom Ademom ef. Omerovićem. Školovao se u Behram-begovoj medresi od 1996. do 2001. godine. U periodu od 2008. do 2013. godine je studirao na Fakultetu islamskih nauka u Sarajevu. Po dolasku sa odsluženja vojnog roka radio je kao honorarni imam u džematu Jasenica (MIZ Gradačac). Od septembra 2003. godine pa do septembra 2015. godine radio je kao imam u džematu Donji Lukavac (MIZ Gradačac). Od 2015. godine obnaša dužnost imama u džamiji Bukvara u Gradačcu. Hifz je počeo učiti 2007. godine. Njegov muhaffiz je bio hafiz Mirnes. ef. Spahić. Hifz je polagao pred Komisijom Rijaseta IZ u BiH u periodu od 21.2. do 6.3.2024. godine. Hafiska dova mu je proučena u džamiji džemata Zelinja Donja, 14.4.2024. godine. Trenutno je student na master studiju islamske teologije na Fakultetu islamskih nauka u Sarajevu. Oženjen je suprugom Ernadom i ima dvoje djece, Saru i Samida.

101. Hfz. Eldin Čolić – sin Edina i Selme, rođen 28.2.2008. godine u Zenici. Živi u Žepču. Osnovnu školu je završio u Žepču, 2024. godine. Iste godine se upisao u Behram-begovu medresu u kojoj je trenutno učenik prvog razreda. U mektebu se posebno isticao u učenju Kur'ana, te je nekoliko puta predstavljao svoj džemat na mektebskim takmičenjima. U mektebu je proglašen učenikom generacije. Hifz je polagao pred Komisijom Rijaseta IZ u BiH u periodu od 15.4. do 29.4.2024. godine. Muhaffiz mu je bio hfz. Mustafa ef. Efendić, a hafiska dova mu je proučena 22.6.2024. godine u Gradskoj džamiji u Žepču.

102. Hfz. Mudžahid Smajlović – sin Asima i Fikre, rođen je 24.1.2001. godine u Tuzli. Završio je Prvu osnovnu školu u Živinicama, nakon čega je upisao Behram-begovu medresu u Tuzli. U Medresi se školovao od 2016. do 2020. godine. Nakon Medrese, školovanje je nastavio na Internacionalnom univerzitetu u Sarajevu, odsjek Psihologija. Profesionalno se bavi košarkom. Sa nepunih šest godina je počeo učiti sufaru, te za kratko vrijeme savladao tečno učenje Kur'ana. Hifz je njegov cjeloživotni put, ali intenzivnije

učenje Kur'ana napamet počeo je 2021. godine. Hifz je polagao pred Komisijom Rijaseta IZ u BiH u periodu od 20.5. do 3.6.2024. godine. Muhaffiz mu bio je otac Asim Smajlović, a hafiska dova mu je proučena 7.7.2024. godine u Džamiji islamskog centra u Živinicama.

103. Hfz. Fahrudin Žbanić – sin Husejna i Aiše, rođen 9.1.1977. godine u Tuzli. Osnovnu školu je završio u Poljicu (Lukavac). Mekteb je pohađao kod Tajib ef. Karića, u džematu Poljice-Ugar. Školovao se u Behram-begovoj medresi u Tuzli od 1993. do 1997. godine. Diplomirao je na Fakultetu islamskih nauka u Sarajevu. Tokom studija radio je kao honorarni imam u sarajevskim džematima Obhodža i Nahorevo. Također, u jednom periodu je radio kao imam u džematu Gaj, Jagnjid, Kute, MIZ Gornji Vakuf. Od 2007. godine, imam je u džematu Poljice-Ugar, MIZ Puračić. Hifz je počeo učiti 17.2.2022. godine pred muhaffizom hfz. Mirnes ef. Spahićem. Hifz je polagao pred Komisijom Rijaseta IZ u BiH u periodu od 24.6.2024. do 8.7.2024. godine. Hafiska dova mu je proučena u džematu Poljice-Ugar, 22.9.2024. godine. Oženjen je muallimom Suadom Šehić-Žbanić.

104. Hfz. Sinanović Lejla – kćerka Fahrudina i Remzije iz Miljanovaca kod Kalesije, rođena je 12.7.2002. godine u Tuzli. Mekteb je pohađala u Miljanovcima, pred muallimom Muamer ef. Kamezićem. Osnovno obrazovanje započela je u područnoj Osnovnoj školi u Miljanovcima, a završila u Osnovnoj školi u Kalesiji 2017. godine, kao učenica generacije. Nakon osnovne škole upisala se u Behram-begovu medresu. Učenje Kur'ana napamet počela je u prvom razredu medrese pred muhaffizom hafizom Edin ef. Dedićem. Nakon završetka Medrese, 2021. godine, upisala je Fakultet inženjeringa i prirodnih nauka na Internacionalnom univerzitetu u Sarajevu, odsjek Softverski inženjering, na kojem je trenutno studentica četvrte godine. Nakon upisa na Fakultet, hifz je nastavila učiti pred svojim dajdzom, hafizom Rijad ef. Đedovićem. Hifz je polagala pred Komisijom Rijaseta IZ u BiH u periodu od 2.9. do 16.9.2024. godine. Hafiska dova joj je proučena u džamiji Behram-begove medrese u Tuzli, 22.10.2024. godine.

105. Hfz. Hamid Mahmutović – sin Sulejmana i Elvedine, rođen je 29.9.2002. godine u Tuzli. Završio je Prvu osnovnu školu u Živinicama, sa odličnim uspjehom tokom cijelog školovanja. Od prvog razreda osnovne škole polaznik je mektebske pouke. Muallim mu je bio Ferid ef. Fejzić. Tokom pohađanja mektebske pouke posebno se isticao i ostvarivao zapažene rezultate na takmičenjima iz Kiraeta. Kao učenik šestog razreda osnovne škole osvojio je prvo mjesto u kategoriji "Kiraet - mlađi uzrast" na nivou Medžlisa islamske zajednice Živinice, te drugo mjesto na nivou Muftiluka tuzlanskog. U osmom razredu osvojio je treće mjesto u kategoriji "Kiraet -stariji uzrast", a godinu dana kasnije osvojio je prvo mjesto u istoj kategoriji. Školovao se u Behram-begovoj medresi od 2017. do 2021. godine. Hifz je počeo učiti u Medresi pred muhaffizom hafizom Nedžadom Vehabovićem. Nakon završetka Medrese, 2021. godine, školovanje je nastavio na Fakultetu islamskih nauka u Sarajevu i trenutno je student četvrte godine na odsjeku Islamska teologija. Upisom na Fakultet, put hifza je nastavio i uspješno okončao pred muhaffizom mr. hafizom Ammar ef. Bašićem. Hifz je polagao pred Komisijom Rijaseta IZ u BiH u periodu od 23.9. do 7.10.2024. godine. Hafiska dova mu je proučena 26.10.2024. godine, u džematu Oskova, MIZ Živinice.

106. Hfz. Idris Omerović – sin Husejina i Raze, rođen 29.5.1991. godine u Zvorniku. Od 1992. godine živi u Grazu (Austrija). Osnovnu školu je završio u Grazu. U Behram-begovoj medresi se školovao od 2005. do 2009. godine. Nakon završetka Medrese, upisao se na Islamski pedagoški fakultet u Bihaću, odsjek Islamske vjeronauke, na kojem je diplomirao 2016. godine. Magistrirao je 2021. godine na Pravnom fakultetu Karl-Franzens Univerziteta u Grazu. Hifz je polagao pred Komisijom Rijaseta IZ u BiH u periodu od 22.11.2024. do 7.12.2024. godine. Muhaffiz mu je bio hfz. Mustafa ef. Efendić. Oženjen je i otac troje djece.

107. Hfz. Muhamed Mešić - sin Muje i Zlate, rođen 11.9.2001. godine u Zenici. Živi u Tešnju. Završio je Osnovnu školu "Rešad Kadić" u Tešnju 2016. godine. Bio je učenik Šarenog mekteba gdje je ostvario zapažene rezultate na mektebskim takmičenjima. 2016. godine upisao se u Behram-begovu medresu u Tuzli, koju je završio 2020. godine. Nakon završene Medrese, upisao se na Fakultet

islamskih nauka u Sarajevu, odsjek Islamska teologija, na kojem je diplomirao 2024. godine. Trenutno je student master studija na Fakultetu islamskih nauka u Sarajevu. Hifz je počeo učiti kao učenik Medrese. Prvi muhaffiz mu je bio hfz. Mirnes Spahić. Intenzivno učenje hifza je nastavio nakon Medrese sa muhaffizom hfz. Ahmed ef. Bukvićem. Hifz je polagao pred Komisijom Rijasetu IZ u BiH u periodu od 26.11. do 10.12.2024. godine.

ZAKLJUČAK

Behram-begova medresa je u svom obnovljenom radu, od 1993. godine među svršenicima i profesorima Medrese promovisala ukupno stotinu sedam hafiza, i to: 74 muška kandidata i 31 ženski kandidat. Dva hafiza su profesori Behram-begove medrese.

Aktivan rad voditelja sekcije hifza u Behram-begovoj medresi, veliki broj učenika koji uče hifz i koji su na putu da steknu časnu titulu hafiza Kur'ana, garant su da će se, uz Allahovu pomoć, broj hafiza tuzlanske medrese iz godine u godinu stalno povećavati.

”Učite Kur’an, jer Uzvišeni Allah neće kazniti srce u kojem je Kur’an. Kur’an je Allahova gozba, siguran je onaj ko joj prisustvuje, i neka se raduje nagradi onaj ko voli Kur’an.” (Hadis)